

aricordo di sier Francesco Valier, *quondam* sier Hieronimo, è di pregadi.

Fu posto per li diti dar a domino Chiriacho dil Borgo di condotta di più fanti 100, sichè habbi 600 et di provisiom ducati 100 più, sichè habbi ducati 400 a l'anno, et fu presa.

Fu tolto il scurtinio di do savij dil Consejo che manca, et butate le tesere, per esser intra' in altro, no fo balotà. Restò Consejo di X con la zonta di danari, et fo tolto in pregadi sier Alvisè Pixani, *quondam* sier Piero con ducati 1000 prestadi a la Signoria nostra sichome hanno fato li altri, *etc.*; el qual li portò la matina e vene quel di in pregadi.

Nota. Tutta la terra è piena che 250 lance erano partite di Campo è andate a Milam, e questo perchè sguizari havia roto e tolto Como; e questo aviso ha sier Filippo Capello di sier Pollo el cavalier, per lettere di suo padre, *tamen publice* nulla è.

331 *Copia di uno capitolo di lettere di sier Pelegrim Venier, quondam sier Domenego, date in Palermo, a dì 5 zugno 1510.*

Ogni di zonne barze et altri fusti a la Fagagnana et *solum* se aspeta le galie di Napoli che el capitano Piero Navaro non ne vuol pati, à scritto volersi partir lunedì al tutto, perhò tal secreto niun lo sa, e son zonte le barze 13 da Buzia con fanti 4000, le barze 5 de Malicha con fanti 2000, una de Sardegna con fanti 400, la barza di Borges da Zenoa con arme per armar fanti 4000, barze do de Chartagenia con fanti et artelarie, ogni di zonne et se ingrossa l'armada, et sono venuti molti principal de Spagna, tal è fama retrovarse da persone 20 milia, a modo se dize non credo tanto, ma zonne da ogni parte navilij, et per el capitano è stà mandà a tuor tutte le barche e palaschermi servono a le tonare de Zafalù, qui e de Trapano, per aver barche assai da meter in terra zente, che in questo è lo pensier suo, ne per niuno se sa de fermo dove fermamente habbi a inferir in Barbaria per non volerli far sospeti e tenerli divixi, che si fermi andaseno in un luogo poria trovarlo ben munito, et à levado de qui biscoti chantarra 10 milia, farine bote 300, lance 800, zape e zaponi 2000, pali de ferro 800 e se ne fa di altri; hanno nolizzato come vi dissi la nave de Rupalo, porta salme 3000 e cargato su do altre barze tal munitione da cantera 1000, carne salata.

Da Napoli, zonse 5 barze charge de vituarie con fanti 1000 e molte fuste e bregantini 17, serano bone barze secondo è dito da 60 galie, con queste

de Napoli, 13 charavelle fuste e bregantini a la somma de velle 120, pensate son per far portar le velle quando serano apresso a terra fino a le barche per far terror, una bellissima artellaria e tutti li fanti non à soldo, ma vano per la cruciata, per quel s'è ditto et maistri mureri assai el piere per far un castello, chi dize do, non lo credo, ma piere assai e botte per far repari hanuo, e menasse do navilij con aqua in botte. Per qualche persona da conto m'è stà dito l'anderà prima a Tripoli, poi scorerà in Cypri e atenderà le galie de Prejan e la galeaza del papa e con l'armada de Rodi tuor Cypri, hanno fama esser poche persone e mal devote de San Marco, e dicese el re voler per zerto conquistar tal luogi per voler in persona passar in Cypri e li far la massa per andar a conquistar Jerusalem, e parli Tripoli passo importante a far turchi non passi più in Barbaria, e tuta sia per esser sua. E ve dico questo tuor farina in bote e tante munition havendo questo regno abundantissimo è da ben considerar, e tanto più ch'el vice re andò in persona, e lhor da solli secretissime senza alcun altro se parlò, e quando el gran capitano passò in reame, dize tal fama era de Barbaria, e lui e il vize re solli ave l'hordine, per l'artellaria non hanno un cavallo ch'è segno de sospetar vadino in Levante, perhò tuto vi ho dito, la fama vulgar è per Barbaria, ma tanti preparatorij è gran cossa, perhò forsi la fa da prudenti, pensa de ritrovar scontri e impazi, e cui stima lo inimicho fa bene e la indivina. Su tal armada è un gran morbo e patisseno de cosse assai che tutti di questo regno li aborrisse, s'è dito Prejan era in Corsicha con le sei galie e brigantini, missier Hieronimo Vianello con 18 bandiere è sopra l'armada con ottima fama. Quanto che ve scrivo de sopra, parte ho inteso e parte ho visto, fatene quel judizio vi par, perchè el me tocha son copioso.

Item, questa sera son zonte do barche da Melazo et *etiam* uno corier, et per quello s'è ditto a la fossa de San Zuane in Calavria son arivate 12 galie di la illustrissima Signoria, et 6 bastarde è fama sia per vegnir, per la qual cossa se fa varij discorsi per Zenoa e quelle parte, e se pensa questa sia per esser causa di la dimora de le galie se aspeta da Napoli, e questa venuta de tal galie de Venexia fa creder l'armada non sia per andar in Levante, chè Dio lo prometi.

Dil mexe di lujo 1510.

A dì primo fo il zorno di San Marziliam, si fa festa in questa cità per vitorie aute. Et reduiti in Cole-

331 *

332